

# রূপসী বাংলা

জীবনানন্দ দাশ

BANGLADARSHAN.COM

আপনার প্রিয়জনের স্মৃতি অক্ষয় করে রাখতে “রূপসী বাংলা” কবিতাটি তাঁর নামে উৎসর্গ করুন।  
ব্যয় নামমাত্র। যোগাযোগ করুন : [contact@bangladarshan.com](mailto:contact@bangladarshan.com)

সেইদিন এই মাঠ স্তব্ধ হবেনাকো জানি—  
এই নদী নক্ষত্রের তলে  
সেদিনও দেখিবে স্বপ্ন—  
সোনার স্বপ্নের সাধ পৃথিবীতে কবে আর ঝরে !  
আমি চলে যাব বলে  
চালতামূল কি আর ভিজিবে না শিশিরের জলে  
নরম গন্ধের ঢেউয়ে ?  
লক্ষ্মীপেঁচা গান গাবে নাকি তার লক্ষ্মীটির তরে ?  
সোনার স্বপ্নের সাধ পৃথিবীতে কবে আর ঝরে !  
চারিদিকে শান্ত বাতি—ভিজে গন্ধ—মৃদু কলরব ;  
খেয়ানোকোগুলো এসে লেগেছে চরের খুব কাছে ;  
পৃথিবীর এইসব গল্প বেঁচে রবে চিরকাল ;—  
এশিরিয়া ধুলো আজ—বেবিলন ছাই হয়ে আছে।

তোমরা যেখানে সাধ চলে যাও—আমি এই বাংলার পারে  
 রয়ে যাব ; দেখিব কাঁঠালপাতা ঝরিতেছে ভোরের বাতাসে ;  
 দেখিব খয়েরি ডানা শালিকের সন্ধ্যায় হিম হয়ে আসে,  
 ধবল রোমের নিচে তাহার হলুদ ঠ্যাং ঘাসে অন্ধকারে  
 নেচে চলে—একবার—দুইবার—তারপর হঠাৎ তাহারে  
 বনের হিজল গাছ ডাক দিয়ে নিয়ে যায় হৃদয়ের পাশে ;  
 দেখিব মেয়েলি হাত সক্রিয়—শাদা শাঁখা ধূসর বাতাসে  
 শঞ্জের মতো কাঁদে : সন্ধ্যায় দাঁড়াল সে পুকুরের ধারে,  
 খইরঙা হাঁসটিরে নিয়ে যাবে যেন কোন্ কাহিনীর দেশে—  
 ‘পরণ-কথা’র গন্ধ লেগে আছে যেন তার নরম শরীরে,  
 কল্মিদামের থেকে জন্মেছে সে যেন এই পুকুরের নীড়ে—  
 নীরবে পা ধোয় জলে একবার—তারপর দূরে নিরুদ্দেশে  
 চলে যায় কুয়াশায়,—তবু জানি কোনোদিন পৃথিবীর ভিড়ে  
 হারাব না তারে আমি—সে যে আছে আমার এ বাংলার তীরে।

বাংলার মুখ আমি দেখিয়াছি, তাই আমি পৃথিবীর রূপ  
 খুঁজিতে যাই না আর : অন্ধকারে জেগে উঠে ডুমুরের গাছে  
 চেয়ে দেখি ছাতার মতন বড় পাতাটির নিচে বসে আছে  
 ভোরের দয়েলপাখি-চারিদিকে চেয়ে দেখি পল্লবের স্তূপ  
 জাম-বট-কাঁঠালের-হিজলের-অশথের করে আছে চূপ ;  
 ফণীমনসার ঝোপে শটিবনে তাহাদের ছায়া পড়িয়াছে ;  
 মধুকর ডিঙা থেকে না জানি সে কবে চাঁদ চম্পার কাছে  
 এমনই হিজল-বট-তমালের নীল ছায়া বাংলার অপরূপ রূপ

দেখেছিল ; বেহুলাও একদিন গাঙুরের জলে ভেলা নিয়ে-  
 কৃষ্ণ-দ্বাদশীর জ্যোৎস্না যখন মরিয়া গেছে নদীর চড়ায়-  
 সোনালি ধানের পাশে অসংখ্য অশ্বখ বট দেখেছিল, হয়,

শ্যামার নরম গান শুনেছিল-একদিন অমরায় গিয়ে

ছিন্ন খঞ্জনার মতো যখন সে নেচেছিল ইন্দ্রের সভায়

বাংলার নদী-মাঠ-ভাঁটফুল ঘুঙুরের মতো তার কেঁদেছিল পায়।

যতদিন বেঁচে আছি আকাশ চলিয়া গেছে কোথায় আকাশে  
 অপরাজিতার মতো নীল হয়ে-আরও নীল-আরও নীল হয়ে  
 আমি যে দেখিতে চাই ;-সে আকাশ পাখনায় নিঙড়িয়ে লয়ে  
 কোথায় ভোরের বক মাছরাঙা উড়ে যায় আশ্বিনের মাসে,  
 আমি যে দেখিতে চাই,-আমি যে বসিতে চাই বাংলার ঘাসে  
 পৃথিবীর পথে ঘুরে বহুদিন অনেক বেদনা প্রাণে সয়ে  
 ধানসিড়িটির সাথে বাংলার শ্মশানের দিকে যাব বয়ে,  
 যেইখানে এলোচুলে রামপ্রসাদের সেই শ্যামা আজও আসে,  
 যেইখানে কঙ্কাপেড়ে শাড়ি পরে কোনো এক সুন্দরীর শব  
 চন্দন চিতায় চড়ে-আমের শাখায় শুক ভুলে যায় কথা ;  
 যেইখানে সবচেয়ে বেশি রূপ-সবচেয়ে গাঢ় বিষণ্ণতা ;  
 যেখানে শুকায় পদ্ম-বহু দিন বিশালাক্ষী যেখানে নীরব ;  
 যেইখানে একদিন শঙ্খমালা চন্দ্রমালা মাণিকমালার  
 কাঁকন বাজিত, আহা, কোনোদিন বাজিবে কি আর !

একদিন জলসিড়ি নদীটির পারে এই বাংলার মাঠে  
 বিশীর্ণ বটের নিচে শুয়ে রবো,—পশমের মতো লাল ফল  
 ঝরিবে বিজন ঘাসে,—বাঁকা চাঁদ জেগে রবে—নদীটির জল  
 বাঙালি মেয়ের মতো বিশালাক্ষী মন্দিরের ধূসর কপাটে  
 আঘাত করিয়া যাবে ভয়ে-ভয়ে—তারপর যেই ভাঙা ঘাটে  
 রূপসীরা আজ আর আসেনাকো, পাট শুধু পচে অবিরল,  
 সেইখানে কলমীর দামে বেঁধে প্রেতিনীর মতন কেবল  
 কাঁদবে সে সারারাত,—দেখিবে কখন কারা এসে আমকাঠে

সাজায়ে রেখেছে চিতা : বাংলার শ্রাবণের বিস্মিত আকাশ  
 চেয়ে রবে, ভিজে পঁচা শান্ত স্নিগ্ধ চোখ মেলে কদমের বনে  
 শোনাবে লক্ষ্মীর গল্প—ভাসানের গান নদী শোনাবে নির্জনে ;  
 চারিদিকে বাংলার ধানী শাড়ি—শাদা শাঁখা—বাংলার ঘাস  
 আকন্দ বাসকলতা ঘেরা এক নীল মঠ—আপনার মনে  
 ভাঙিতেছে ধীরে ধীরে ;—চারিদিকে এই সব আশ্চর্য উচ্ছ্বাস—

আকাশে সাতটি তারা যখন উঠেছে ফুটে আমি এই ঘাসে  
 বসে থাকি ; কামরাঙা-লাল মেঘ যেন মৃত মনিয়ার মতো  
 গঙ্গাসাগরের ঢেউয়ে ডুবে গেছে—আসিয়াছে শান্ত অনুগত  
 বাংলার নীল সন্ধ্যা—কেশবতী কন্যা যেন এসেছে আকাশে :  
 আমার চোখের 'পরে আমার মুখের 'পরে চুল তার ভাসে ;  
 পৃথিবীর কোনো পথ এ কন্যারে দেখেনিকো—দেখি নাই অত  
 অজস্র চুলের চুমা হিজলে-কাঁঠালে-জামে ঝরে অবিরত,  
 জানি নাই এত স্নিগ্ধ ঝরে রূপসীর চুলের বিন্যাসে

পৃথিবীর কোনো পথে : নরম ধানের গন্ধ—কলমির ঘ্রাণ,  
 হাঁসের পালক, শর, পুকুরের জল, চাঁদা-সরপুঁটিদের  
 মৃদু ঘ্রাণ, কিশোরীর চাল-ধোয়া ভিজে হাত—শীত হাতখান,  
 কিশোরের পায়ে-দলা মুথাঘাস—লাল-লাল বটের ফলের  
 ব্যথিত গন্ধের ক্লান্ত নীরবতা—এরই মাঝে বাংলার প্রাণ :  
 আকাশে সাতটি তারা যখন উঠেছে ফুটে আমি পাই টের।

কোথাও দেখেনি, আহা, এমন বিজন ঘাস-প্রান্তরের পারে  
 নরম বিমর্ষ চোখে চেয়ে আছে-নীল বুকে আছে তাহাদের  
 গঙ্গাফড়িঙের নীড়, কাঁচপোকা, প্রজাপতি, শ্যামাপোকা ঢের,  
 হিজলের ক্লান্ত পাতা-বটের অজস্র ফল ঝরে বারে-বারে  
 তাহাদের শ্যাম বুকে ; -পাড়াগাঁর কিশোরেরা যখন কান্তারে  
 বেতের নরম ফল, নাটাফল খেতে আসে, ধুন্দুল বীজের  
 খোঁজ করে ঘাসে-ঘাসে,-বক তাহা জানেনাকো, পায়নাকো টের  
 শালিক-খঞ্জনা তাহা ; -লক্ষ-লক্ষ ঘাস এই নদীর দু'ধারে

নরম কান্তারে এই পাড়াগাঁর বুকে শুয়ে সে কোন দিনের  
 কথা ভাবে ; তখন এ জলসিড়ি শুকায়নি, মজেনি আকাশ,  
 বল্লাল সেনের ঘোড়া-ঘোড়ার কেশর-ঘেরা ঘুঙুর জিনের  
 শব্দ হত এই পথে-আরও আগে রাজপুত্র কতদিন রাশ

টেনে-টেনে এই পথে-কী যেন খুঁজেছে, আহা, হয়েছে উদাস ;  
 আজ আর খোঁজাখুঁজি নাই কিছু-নাটাফলে মিটিতেছে আশ-



৮

হায় পাখি, একদিন কালীদহে ছিলে না কি—দহের বাতাসে  
আষাঢ়ের দু'পহরে কলরব কর নি কি এই বাংলায় !  
আজ সারাদিন এই বাদলের কোলাহলে মেঘের ছায়ায়  
চাঁদ সদাগর : তার মধুকর ডিঙাটির কথা মনে আসে,  
কালীদহে কবে তারা পড়েছিল একদিন ঝড়ের আকাশে,—  
সেদিনও অসংখ্য পাখি উড়েছিল না কি কালো বাতাসের গায়,  
আজ সারাদিন এই বাদলের জলে ধলেশ্বরীর চড়ায়  
গাঙশালিকের ঝাঁক, মনে হয়, যেন সেই কালীদহে ভাসে :  
এই সব পাখিগুলো কিছুতেই আজিকার নয় যেন—নয়—

এ নদীও ধলেশ্বরী নয় যেন—এ-আকাশ নয় আজিকার :  
ফণীমনসার বনে মনসা রয়েছে না কি ?—আছে ; মনে হয়,  
এ নদী কি কালীদহ নয় ? আহা, ঐ ঘাটে এলানো খোঁপার  
সনকার মুখ আমি দেখি না কি ? বিষণ্ণ মলিন ক্লান্ত কী যে  
সত্য সব ;—তোমার এ স্বপ্ন সত্য, মনসা বলিয়া গেল নিজে।

BANGLADARSHAN.COM

জীবন অথবা মৃত্যু চোখে রবে—আর এই বাংলার ঘাস  
 রবে বুক্কে ; এই ঘাস : সীতারাম রাজারাম রামনাথ রায়—  
 ইহাদের ঘোড়া আজও অন্ধকারে এই ঘাস ভেঙে চলে যায়—  
 এই ঘাস : এরই নিচে কঙ্কাবতী-শঙ্খমালা করিতেছে বাস :  
 তাদের দেহের গন্ধ, চাঁপাফুল মাখা ম্লান চুলের বিন্যাস  
 ঘাস আজও ঢেকে আছে ; যখন হেমন্ত আসে গৌড় বাংলায়  
 কার্তিকের অপরাহ্নে হিজলের পাতা শাদা উঠানের গায়  
 ঝরে পড়ে, পুকুরের ক্লান্ত জল ছেড়ে দিয়ে চলে যায় হাঁস,  
 আমি এ ঘাসের বুক্কে শুয়ে থাকি—শালিক নিয়েছে নিঙড়ায়ে  
 নরম হলুদ পায়ে এই ঘাস ; এ সবুজ ঘাসের ভিতরে  
 সোঁদা ধুলো শুয়ে আছে—কাঁচের মতন পাখা এ ঘাসের গায়ে  
 ভেরেণ্ডাফুলের নীল ভোমরারা বুলাতেছে—শাদা স্তন ঝরে  
 করবীর : কোন্-এক কিশোরী এসে ছিঁড়ে নিয়ে চলে গেছে ফুল,  
 তাই দুধ ঝরিতেছে করবীর ঘাসে-ঘাসে : নরম ব্যাকুল।

যেদিন সরিয়া যাব তোমাদের কাছ থেকে—দূর কুয়াশায়  
 চলে যাব, সেদিন মরণ এসে অন্ধকারে আমার শরীর  
 ভিক্ষা করে লয়ে যাবে ;—সেদিন দু-দণ্ড এই বাংলার তীর—  
 এই নীল বাংলার তীরে শুয়ে একা-একা কি ভাবিব, হয় ;  
 সেদিন রবে না কোনো ক্ষোভ মনে—এই সোঁদা ঘাসের ধুলায়  
 জীবন যে কাটিয়াছে বাংলায়—চারিদিকে বাঙালির ভিড়  
 বহুদিন কীর্তন-ভাসান গান রূপকথা যাত্রা পাঁচালির  
 নরম নিবিড় ছন্দে যারা আজও শ্রাবণের জীবন গোঙায়,  
 আমারে দিয়েছে তৃপ্তি ; কোনোদিন রূপহীন প্রবাসের পথে  
 বাংলার মুখ ভুলে খাঁচার ভিতরে নষ্ট শূকরের মতন  
 কাটাইনি দিন-মাস, বেহুলার লহনার মধুর জগতে  
 তাদের পায়ের ধুলো-মাখা পথে বিকায়ে দিয়েছি আমি মন  
 বাঙালি নারীর কাছে—চাল-ধোয়া স্নিগ্ধ হাত, ধান-মাখা চুল,  
 হাতে তার শাড়িটির কস্তা-পাড় ;—ডাঁশা আম, কামরাঙা, কুল।

পৃথিবী রয়েছে ব্যস্ত কোনখানে সফলতা শক্তির ভিতর,  
 কোনখানে আকাশের গায়ে রুঢ় মনুমেন্ট উঠিতেছে জেগে,  
 কোথায় মাস্তুল তুলে জাহাজের ভিড় সব লেগে আছে মেঘে,  
 জানি নাকো ;—আমি এই বাংলার পাড়াগাঁয়ে বাঁধিয়াছি ঘর :  
 সন্ধ্যায় যে দাঁড়কাক উড়ে যায় তালবনে—মুখে দুটো খড়  
 নিয়ে যায়—সকালে যে নিমপাখি উড়ে আসে কাতর আবেগে  
 নীল তেঁতুলের বনে—তেমনি করুণা এক বুকো আছে লেগে ;  
 বঁইচির বনে আমি জোনাকির রূপ দেখে হয়েছি কাতর ;

কদমের ডালে আমি শুনেছি যে লক্ষ্মীপেঁচা গেয়ে গেছে গান  
 নিশুতি জ্যোৎস্নার রাতে,—টুপ্-টুপ্-টুপ্-টুপ্ সারারাত ঝরে  
 শুনেছি শিশিরগুলো,—স্নান মুখে গড় এসে করেছে আহ্বান  
 ভাঙা সোঁদা ইঁটগুলো,—তারই বুকো নদী এসে কী কথা মর্মরে,  
 কেউ নাই কোনোদিকে—তবু যদি জ্যোৎস্নায় পেতে থাক কান  
 গুনিবে বাতাসে শব্দ : ‘ঘোড়া চড়ে কই যাও হে রায়রায়ান—’

ঘুমায়ে পড়িব আমি একদিন তোমাদের নক্ষত্রের রাতে  
 শিয়রে বৈশাখ মেঘ-শাদা-শাদা যেন কড়ি-শঙ্খের পাহাড়  
 নদীর ওপার থেকে চেয়ে রবে-কোনো এক শঙ্খবালিকার  
 ধূসর রূপের কথা মনে হবে-এই আম-জামের ছায়াতে  
 কবে যেন তারে আমি দেখিয়াছি-কবে যেন রাখিয়াছে হাতে  
 তার হাত-কবে যেন তারপর শ্মশানচিতায় তার হাড়  
 ঝরে গেছে, কবে যেন ; এ জনমে নয় যেন-এই পাড়াগাঁর  
 পথে তবু তিনশো বছর আগে হয়তো বা-আমি তার সাথে  
 কাটায়েছি ;-পাঁচশো বছর আগে হয়তো বা-সাতশো বছর  
 কেটে গেছে তারপর তোমাদের আম-জাম-কাঁঠালের দেশে ;  
 ধান কাটা হয়ে গেলে মাঠে-মাঠে কত বার কুড়ালাম খড়,  
 বাঁধিলাম ঘর এই শ্যামা আর খঞ্জনার দেশ ভালোবেসে,  
 ভাসানের গান শুনে কতবার ঘর আর খড় গেল ভেসে,  
 মাথুরের পালা বেঁধে কতবার ফাঁকা হল খড় আর ঘর।

ঘুমায়ে পড়িব আমি একদিন তোমাদের নক্ষত্রের রাতে ;  
 তখনও যৌবন প্রাণে লেগে আছে হয়তো বা-আমার তরুণ দিন  
 তখনও হয়নি শেষ-সেই ভালো-ঘুম আসে-বাংলার তৃণ  
 আমার বুকের নিচে চোখ বুজে-বাংলার আমার পাতাতে  
 কাঁচপোকা ঘুমায়েছে-আমিও ঘুমায়ে রবো তাহাদের সাথে,  
 ঘুমাব প্রাণের সাথে এই মাঠে-এই ঘাসে-কথাভাষাহীন  
 আমার প্রাণের গল্প ধীরে-ধীরে মুছে যাবে-অনেক নবীন  
 নতুন উৎসব হবে উজানের-জীবনের মধুর আঘাতে

তোমাদের ব্যস্ত মনে ;-তবুও কিশোর, তুমি নখের আঁচড়ে  
 যখন এ-ঘাস ছিঁড়ে চলে যাবে-যখন মানিকমালা ভোরে  
 লাল-লাল বটফল কামরাঙা কুড়াতে আসিবে এই পথে-  
 যখন হলুদ-বোঁটা শেফালির কোন এক নরম শরতে  
 ঝরিবে ঘাসের 'পরে,-শালিক-খঞ্জনা আজ কতদূর ওড়ে-  
 কতখানি রোদ-মেঘ-টের পাব শুয়ে-শুয়ে মরণের ঘোরে।

যখন মৃত্যুর ঘুমে শুয়ে রব-অন্ধকারে নক্ষত্রের নিচে  
 কাঁঠালগাছের তলে হয়তো বা ধলেশ্বরী চিলাইয়ের পাশে-  
 দিনমানে কোনো মুখ হয়তো সে শ্মশানের কাছে নাহি আসে-  
 তবুও কাঁঠাল-জাম বাংলার-তাহাদের ছায়া যে পড়িছে  
 আমার বুকের 'পরে-আমার মুখের 'পরে নীরবে ঝরিছে  
 খয়েরি অশথপাতা-বঁইছি-শেয়ালকাঁটা আমার এ দেহ ভালোবাসে,  
 নিবিড় হয়েছে তাই আমার চিতার ছাইয়ে-বাংলার ঘাসে  
 গভীর ঘাসের গুচ্ছে রয়েছি ঘুমায়ে আমি-নক্ষত্র নড়িছে

আকাশের থেকে দূর-আরও দূর-আরও দূর-নির্জন আকাশে  
 বাংলার-তারপর অকারণ ঘুমে আমি পড়ে যাই তুলে ;  
 আবার যখন জাগি, আমার শ্মশানচিহ্ন বাংলার ঘাসে

ভরে আছে, চেয়ে দেখি ;-বাসকের গন্ধ পাই-আনারস ফুলে  
 ভোমরা উড়িছে, শুনি-গুবরে পোকাকার ক্ষীণ গুমরানি ভাসিছে বাতাসে  
 রোদের দুপুর ভরে-শুনি আমি : ইহারা আমারে ভালোবাসে-

আবার আসিব ফিরে ধানসিড়িটির তীরে—এই বাংলায়  
 হয়তো মানুষ নয়—হয়তো বা শঙ্খচিল শালিকের বেশে ;  
 হয়তো ভোরের কাক হয়ে এই কার্তিকের নবান্নের দেশে  
 কুয়াশার বুক ভেসে একদিন আসিব এ কাঁঠাল-ছায়ায় ;  
 হয়তো বা হাঁস হব—কিশোরীর—ঘুঙুর রহিবে লাল পায়,  
 সারাদিন কেটে যাবে কলমির গন্ধ-ভরা জলে ভেসে-ভেসে ;  
 আবার আসিব আমি বাংলার নদী-পাঠ-ক্ষেত ভালোবেসে  
 জলাঙ্গীর চেউয়ে ভেজা বাংলার এ সবুজ করুণ ডাঙায় ;  
 হয়তো দেখিব চেয়ে সুদর্শন উড়িতেছে সন্ধ্যার বাতাসে ;  
 হয়তো শুনিবে এক লক্ষ্মীপেঁচা ডাকিতেছে শিমুলের ডালে ;  
 হয়তো খইয়ের ধান ছড়াতেছে শিশু এক উঠানের ঘাসে ;  
 রূপসার ঘোলা জলে হয়তো কিশোর এক শাদা ছেঁড়া পালে  
 ডিঙা বায় ;—রাঙা মেঘ সাঁতরায়ে অন্ধকারে আসিতেছে নীড়ে  
 দেখিব ধবল বক : আমরাই পাবে তুমি ইহাদের ভিড়ে—



যদি আমি ঝরে যাই একদিন কার্তিকের নীল কুয়াশায় ;  
 যখন ঝরিছে ধান বাংলার ক্ষেতে-ক্ষেতে ম্লান চোখ বুজে,  
 যখন চড়াই পাখি কাঁঠালিচাঁপার নীড়ে ঠোঁট আছে গুঁজে,  
 যখন হলুদ পাতা মিশিতেছে উঠানের খয়েরি পাতায়,  
 যখন পুকুরে হাঁস সোঁদা জলে শিশিরের গন্ধ শুধু পায়,  
 শামুক-গুগলিগুলো পড়ে আছে শ্যাওলার মলিন সবুজে,-  
 তখন আমরা যদি পাওনাকো লালশাক-ছাওয়া মাঠে খুঁজে,  
 ঠেস্ দিয়ে বসে আর থাকিনাকো যদি বুনো চল্‌তার গায়,  
  
 তাহলে জানিয়ো তুমি আসিয়াছে অন্ধকারে মৃত্যুর আহ্বান-  
 যার ডাক শুনে রাঙা রৌদ্রেরও চিল আর শালিকের ভিড়  
 একদিন ছেড়ে যাবে আম-জাম বনে নীল বাংলার তীর,  
 যার ডাক শুনে আজ ক্ষেতে-ক্ষেতে ঝরিতেছে খই আর মৌরীর ধান ;-  
 কবে যে আসিবে মৃত্যু : বাসমতী চালে-ভেজা শাদা হাতখান  
 রাখো বুকে, হে কিশোরী, গোরোচনারূপে আমি করিব যে ম্লান-

মনে হয় একদিন আকাশের শুকতারা দেখিব না আর ;  
 দেখিব না হেলেধর রোপ থেকে এক ঝাড় জোনাকি কখন  
 নিভে যায় ;—দেখিব না আর আমি পরিচিত এই বাঁশবন,  
 শুকনো বাঁশের পাতা-ছাওয়া মাটি হয়ে যাবে গভীর আঁধার  
 আমার চোখের কাছে ;—লক্ষ্মীপূর্ণিমার রাতে সে কবে আবার  
 পেঁচা ডাকে জ্যেৎস্নায় ;—হিজলের বাঁকা ডাল করে গুঞ্জরন ;  
 সারারাত কিশোরীর লাল পাড় চাঁদে ভাসে—হাতের কাঁকন  
 বেজে ওঠে : বুঝিব না—গঙ্গাজল, নারকোল-নাডুগুলো তার

জানি না সে করে দেবে—জানি না সে চিনি আর শাদা তালশাঁস  
 হাতে লয়ে পলাশের দিকে চেয়ে দুয়ারে দাঁড়ায়ে রবে কি না...  
 আবার কাহার সাথে ভালোবাসা হবে তার—আমি তা জানি না ;  
 মৃত্যুরে কে মনে রাখে ?...কীর্তিনাশা খুঁড়ে-খুঁড়ে চলে বারো মাস  
 নতুন ডাঙার দিকে—পিছনের অবিরল মৃত চর বিনা  
 দিন তার কেটে যায়—শুকতারা নিভে গেলে কাঁদে কি আকাশ ?

যে শালিক মরে যায় কুয়াশায়—সে তো আর ফিরে নাহি আসে :  
 কাঞ্চনমালা যে কবে ঝরে গেছে ;—বনে আজও কলমির ফুল  
 ফুটে যায়—সে তবু ফেরে না, হয়—বিশালাক্ষী : সে-ও তো রাতুল  
 চরণ মুছিয়া নিয়া চলে গেছে ;—মাঝপথে জলের উচ্ছ্বাসে  
 বাধা পেয়ে নদীরা মজিয়া গেছে দিকে-দিকে—শ্মশানের পাশে  
 আর তারা আসেনাকো ;—সুন্দরীর বনে বাঘ ভিজে জুল-জুল  
 চোখ তুলে চেয়ে থাকে—কত পাটরানীদের গাঢ় এলো চুল  
 এই গৌড় বাংলার—পড়ে আছে তাহার পায়ের তলে ঘাসে

জানে সে কি ! দেখে না কি তারাবনে পড়ে আছে বিচূর্ণ দেউল,  
 বিষ্ণু পদোর দীঘি—ফোঁপরা মহলা ঘাট, হাজার মহাল  
 মৃত সব রূপসীরা : বুকো আজ ভেরেণ্ডার ফুলে ভীমরুল  
 গান গায়—পাশ দিয়ে খল্-খল্-খল্-খল্ বয়ে যায় খাল,  
 তবু ঘুম ভাঙেনাকো—একবার ঘুমালে কে উঠে আসে আর !  
 যদিও ডুকরি যায় শঙ্খচিল—মর্মরিয়া মরে গো মাদার।

কোথাও চলিয়া যাব একদিন ;—তারপর রাত্রির আকাশ  
 অসংখ্য নক্ষত্র নিয়ে ঘুরে যাবে কতকাল জানিব না আমি ;  
 জানিব না কত কাল উঠানে ঝরিবে এই হলুদ বাদামি  
 পাতাগুলো—মাদারের ডুমুরের—সৌন্দা গন্ধ—বাংলার শ্বাস  
 বুকে নিয়ে তাহাদের ;—জানিব না পরথুপী-মধুকুপী ঘাস  
 কতকাল প্রান্তরে ছড়িয়ে রবে—কাঁঠাল-শাখার থেকে নামি  
 পাখনা ডলিবে পৈঁচা এই ঘাসে—বাংলার সবুজ বালামি  
 ধানী শাল পশ্মিনা বুকে তার—শরতের রোদের বিলাস

কতকাল নিঙ্ড়াবে ;—আঁচলে নাটার কথা ভুলে গিয়ে বুঝি  
 কিশোরের মুখ চেয়ে কিশোরী করিবে তার মৃদু মাথা নিচু ;  
 আসন্ন সন্ধ্যার কাক—করণ কাকের দল খোড়ো নীড় খুঁজি  
 উড়ে যাবে ;—দুপুরে ঘাসের বুকে সিঁদুরের মতো রাঙা লিচু  
 মুখ গুঁজে পড়ে রবে ;—আমিও ঘাসের বুকে রব মুখ গুঁজি :  
 মৃদু কাঁকনের শব্দ—গোরোচনা জিনি রঙ চিনিব না কিছু—

তোমার বুকের থেকে একদিন চলে যাবে তোমার সন্তান  
 বাংলার বুক ছেড়ে চলে যাবে ; যে ইঙ্গিতে নক্ষত্রও ঝরে,  
 আকাশের নীলাভ নরম বুক ছেড়ে দিয়ে হিমের ভিতরে  
 ডুবে যায়,-কুয়াশায় ঝরে পড়ে দিকে-দিকে রূপশালি ধান  
 একদিন ;-হয়তো বা নিমপেঁচা অন্ধকারে গাবে তার গান,  
 আমারে কুড়ায়ে নেবে মেঠো হাঁদুরের মতো মরণের ঘরে-  
 হৃদয়ে ক্ষুদের গন্ধ লেগে আছে আকাঙ্ক্ষার-তবুও তো চোখের উপরে  
 নীল মৃত্যু উজাগর-বাঁকা চাঁদ, শূন্য মাঠ, শিশিরের ঘ্রাণ-

কখন মরণ আসে কে বা জানে-কালীদহে কখন যে ঝড়  
 কমলের নাল ভাঙে-ছিঁড়ে ফেলে গাঙচিল শালিকের প্রাণ  
 জানিনাকো ;-তবু যেন মরি আমি এই মাঠ-ঘাটের ভিতর,  
 কৃষ্ণ-যমুনার নয়-যেন এই গাঙুড়ের ঢেউয়ের আঘাণ  
 লেগে থাকে চোখে মুখে-রূপসী বাংলা যেন বুকের উপর  
 জেগে থাকে ; তারই নিচে শুয়ে থাকি যেন আমি অর্ধনারীশ্বর।

গোলপাতা ছাউনির বুক চুমে নীল ধোঁয়া সকালে সন্ধ্যায়  
 উড়ে যায়-মিশে যায় আমবনে কার্তিকের কুয়াশার সাথে ;  
 পুকুরের লাল সর ক্ষীণ ঢেউয়ে বার-বার চায় যে জড়াতে  
 করবীর কচি ডাল ; চুমো খেতে চায় মাছরাঙাটির পায় ;  
 এক-একটি ইঁট ধ্বসে-ডুবজলে ডুব দিয়ে কোথায় হারায়  
 ভাঙা ঘাটলার এই-আজ আর কেউ এসে চাল-ধোঁয়া হাতে  
 বিনুনি খসায়নাকো-শুকনো পাতা সারাদিন থাকে যে গড়াতে ;  
 কড়ি খেলিবার ঘর মজে গিয়ে গোখুরার ফাটলে হারায় ;

ডাইনীর মতো হাত তুলে-তুলে ভাঁট আঁশশ্যাওড়ার বন  
 বাতাসে কী কথা কয় বুঝিনাকো,-বুঝিনাকো চিল কেন কাঁদে ;  
 পৃথিবীর কোনো পথে দেখি নাই আমি, হয়, এমন বিজন  
 শাদা পথ-সোঁদা পথ-বাঁশের ঘোমটা মুখে বিধবার ছাঁদে  
 চলে গেছে-শ্মশানের পারে বুঝি ;-সন্ধ্যা আসে সহসা কখন,  
 সজিনার ডালে পৈঁচা কাঁদে নিম-নিম-নিম কার্তিকের চাঁদে।

## দেশবন্ধু : ১৩২৬-১৩৩২ এর স্মরণে

অশ্বখে সন্ধ্যার হাওয়া লেগেছে নীল বাংলার বনে  
 মাঠে-মাঠে ফিরি একা : মনে হয় বাংলার জীবনে সংকট  
 শেষ হয়ে গেছে আজ ;—চেয়ে দেখ কত শত শতাব্দীর বট  
 হাজার সবুজ পাতা লাল ফল বুকে লয়ে শাখার ব্যজনে  
 আকাঙ্ক্ষার গান গায়—অশ্বখেরও কী যেন কামনা জাগে মনে :  
 সতীর শীতল শব বহু দিন কোলে লয়ে যেন অকপট  
 উমার প্রেমের গল্প পেয়েছে সে,—চন্দ্রশেখরের মতো তার জট  
 উজ্জ্বল হতেছে তাই সপ্তমীর চাঁদে আজ পুনরাগমনে ;

মধুকূপী ঘাস-ছাওয়া ধলেশ্বরীটির পারে গৌরী বাংলার  
 এবার বল্লাল সেন আসিবে না জানি আমি—রায়গুণাকর  
 আসিবে না—দেশবন্ধু আসিয়াছে খরধার পদ্মায় এবার,  
 কালীদহে ক্লান্ত গাঙশালিকের ভিড়ে যেন আসিয়াছে ঝড়,  
 আসিয়াছে চণ্ডীদাস—রামপ্রসাদের শ্যামা সাথে-সাথে তার  
 শঙ্খমালা, চন্দ্রমালা : মৃত শত কিশোরীর কঙ্কণের স্বর।

ভিজে হয়ে আসে মেঘে এ-দুপুর-চিল একা নদীটির পাশে  
 জারুল গাছের ডালে বসে-বসে চেয়ে থাকে ওপারের দিকে ;  
 পায়রা গিয়েছে উড়ে চবুতরে, খোপে তার ; -শসালতাটিকে  
 ছেড়ে গেছে মৌমাছি ; -কালো মেঘ জমিয়াছে মাঘের আকাশে,  
 মরা প্রজাপতিটির পাখার নরম রেণু ফেলে দিয়ে ঘাসে  
 পিপড়েরা চলে যায় ; -দুই দণ্ড আমগাছে শালিকে-শালিকে  
 বুটোপুটি, কোলাহল-বউকথাকও আর রাঙা বউটিকে  
 ডাকে নাকো-হলুদ পাখনা তার কোন্ যেন কাঁঠালে-পলাশে  
 হারিয়েছে ; বউও উঠানে নাই-পড়ে আছে একখানা টেকি :  
 ধান কে কুটিবে বল-কতদিন সে তো আর কোটোনাকো ধান,  
 রোদেও শুকাতে সে যে আসে নাকো চুল তার-করেনাকো স্নান  
 এ-পুকুরে-ভাঁড়ারে ধানের বীজ কলায়ে গিয়েছে তার দেখি,  
 তবুও সে আসেনাকো ; আজ এ-দুপুরে এসে খই ভাজিবে কি ?  
 হে চিল, সোনালি চিল, রাঙা রাজকন্যা আর পাবে না কি প্রাণ ?



## দাঁড়কাক

খুঁজে তার মর মিছে—পাড়াগাঁর পথে তারে পাবেনাকো আর ;  
 রয়েছে অনেক কাক এ উঠানে—তবু সেই ক্লান্ত দাঁড়কাক  
 নাই আর ;—অনেক বছর আগে আমে-জামে হুঁষ্ট এক ঝাঁক  
 দাঁড়কাক দেখা যেত দিন রাত—সে আমার ছেলেবেলাকার  
 কবেকার কথা সব ; আসিবে না পৃথিবীতে সেদিন আবার :  
 রাত না ফুরাতে সে যে কদমের ডাল থেকে দিয়ে যেত ডাক,—  
 এখনও কাকের শব্দে অন্ধকার ভোরে আমি বিমনা, অবাক  
 তার কথা ভাবি শুধু ; এতদিনে কোথায় সে ? কী যে হল তার,  
 কোতায় সে নিয়ে গেছে সঙ্গে করে সেই নদী, ক্ষেত, মাঠ, ঘাস,  
 সেই দিন, সেই রাত্রি, সেই সব ম্লান চুল, ভিজে শাদা হাত,  
 সেই সব নোনা গাছ, করমশা, শামুক, গুগলি, কচি তালশাঁস,  
 সেই সব ভিজে ধুলো, বেলকুঁড়ি-ছাওয়া পথ—ধোঁয়াওঠা ভাত,  
 কোথায় গিয়েছে সব ?—অসংখ্য কাকের শব্দে ভরিছে আকাশ  
 ভোর রাতে—নবান্নের ভোরে আজ বুকে যেন কিসের আঘাত।

পাড়াগাঁর দু-পহর ভালোবাসি-রৌদ্রে যেন গন্ধ লেগে আছে  
 স্বপনের-কোন গল্প, কী কাহিনী, কী স্বপ্ন যে বাঁধিয়াছে ঘর  
 আমার হৃদয়ে, আহা, কেউ তাহা জানেনাকো-কেবল প্রান্তর  
 জানে তাহা, আর ঐ প্রান্তরের শঙ্খচিল ; তাহাদের কাছে  
 যেন এ-জনমে নয়-যেন ঢের যুগ ধরে কথা শিখিয়াছে  
 এ হৃদয়-স্বপ্নে যে-বেদনা আছে : শুষ্ক পাতা-শালিকের স্বর,  
 ভাঙা মঠ-নকশাপেড়ে শাড়িখানা মেয়েটির রৌদ্রের ভিতর  
 হলুদ পাতার মতো সরে যায়, জলসিড়িটির পাশে ঘাসে

শাখাগুলো নুয়ে আছে বহুদিন ছন্দহীন বুনো চালতার :

জলে তার মুখখানা দেখা যায়-ডিঙিও ভাসিছে কার জলে,  
 মালিক কোথাও নাই, কোনোদিন এই দিকে আসিবে না আর,

ঝাঁঝরা-ফোঁপরা, আহা, ডিঙিটিরে বেঁধে রেখে গিয়েছে হিজলে :

পাড়াগাঁর দু-পহর ভালোবাসি-রৌদ্রে যেন ভিজে বেদনার

গন্ধ লেগে আছে, আহা, কেঁদে-কেঁদে ভাসিতেছে আকাশের তলে।

কখন সোনার রোদ নিভে গেছে—অবিরল গুপ্তুরির সারি  
 আঁধারে যেতেছে ডুবে—প্রান্তরের পার থেকে গরম বাতাস  
 ক্ষুধিত চিলের মতো চৈত্রের এ-অন্ধকারে ফেলিতেছে শ্বাস ;  
 কোন্ চৈত্রে চলে গেছে সেই মেয়ে—আসিবে না, করে গেছে আড়ি :  
 ক্ষীরুই গাছের পাশে একাকী দাঁড়িয়ে আজ বলিতে কি পারি  
 কোথাও সে নাই এই পৃথিবীতে—তাহার শরীর থেকে শ্বাস  
 ঝরে গেছে বলে তারে ভুলে গেছে নক্ষত্রের অসীম আকাশ,  
 কোথাও সে নাই আর—পাবনাকো তারে কোনো পৃথিবী নিঙাড়ি ?

এই মাঠে—এই ঘাসে—ফল্‌সা এ-ক্ষীরুয়ে যে গন্ধ লেগে আছে  
 আজও তার ; যখন তুলিতে যাই টেকিশাক—দুপুরের রোদে  
 সর্ষের ক্ষেতের দিকে চেয়ে থাকি—অস্থানে যে ধান ঝরিয়াছে,  
 তাহার দু-এক গুচ্ছ তুলে নিই, চেয়ে দেখি নির্জন আমোদে  
 পৃথিবীর রাঙা রোদ চড়িতেছে আকাজ্জকায় চিনিচাঁপা গাছে—  
 জানি সে আমার কাছে আছে আজও—আজও সে আমার কাছে আছে।

এই পৃথিবীতে এক স্থান আছে—সবচেয়ে সুন্দর করুণ :  
 সেখানে সবুজ ডাঙা ভরে আছে মধুকুপী ঘাসে অবিরল ;  
 সেখানে গাছের নাম : কাঁঠাল, অশ্বখ, বট, জারুল, হিজল ;  
 সেখানে ভোরের মেঘে নাটার রঙের মতো জাগিছে অরুণ ;  
 সেখানে বারুণী থাকে গঙ্গাসাগরের বুক—সেখানে বরুণ  
 কর্ণফুলী ধলেশ্বরী পদ্মা জলাঙ্গীরে দেয় অবিরল জল ;  
 সেইখানে শঙ্খচিল পানের বনের মতো হাওয়ায় চঞ্চল,  
 সেইখানে লক্ষ্মীপেঁচা ধানের গন্ধের মতো অস্ফুট, তরুণ ;  
 সেখানে লেবুর শাখা নুয়ে থাকে অন্ধকারে ঘাসের উপর ;  
 সুদর্শন উড়ে যায় ঘরে তার অন্ধকার সন্ধ্যার বাতাসে ;  
 সেখানে হলুদ শাড়ি লেগে থাকে রূপসীর শরীরের 'পর—  
 শঙ্খমালা নাম তার : এ-বিশাল পৃথিবীর কোনো নদী ঘাসে  
 তারে আর খুঁজে তুমি পাবেনাকো—বিশালাক্ষী দিয়েছিল বর  
 তাই সে জন্মেছে নীল বাংলার ঘাস আর ধানের ভিতর।

কত ভোরে-দু-পহরে-সন্ধ্যায় দেখি নীল শুপুরির বন  
 বাতাসে কাঁপিছে ধীরে ; -খাঁচার শুকের মতো গাহিতেছে গান  
 কোন এক রাজকন্যা-পরনে ঘাসের শাড়ি-কালো চুলে ধান  
 বাংলার শালিধান-আঙিনায় ইহাদের করেছে বরণ,  
 হৃদয়ে জলের গন্ধ কন্যার-ঘুম নাই, নাহিকো মরণ  
 তার আর কোনোদিন-পালঙ্কে সে শোয়নাকো, হয়নাকো ম্লান,  
 লক্ষ্মীপেঁচা শ্যামা আর শালিকের গানে তার জাগিতেছে প্রাণ-  
 সারাদিন-সারারাত বুক করে আছে তারে শুপুরির বন ;

সকালে কাকের ডাকে আলো আসে, চেয়ে দেখি কালো দাঁড়কাক  
 সবুজ জঙ্গল ছেয়ে শুপুরির-শ্রীমন্তুও দেখেছে এমন :  
 যখন ময়ূরপঙ্খী ভোরের সিন্দুর মেঘে হয়েছে অবাক,  
 সুদূর প্রবাস থেকে ফিরে এসে বাংলার শুপুরির বন  
 দেখিয়াছে-অকস্মাৎ গাঢ় নীল ; করুণ কাকের ক্লান্ত ডাক  
 শুনিয়াছে-সে কত শতাব্দী আগে ডেকেছিল তাহারা যখন।

এই ডাঙা ছেড়ে হয় রূপ কে খুঁজিতে যায় পৃথিবীর পথে।  
 বটের শুকনো পাতা যেন এক যুগান্তের গল্প ডেকে আনে :  
 ছড়ায়ে রয়েছে তারা প্রান্তরের পথে-পথে নির্জন অস্থানে ;—  
 তাদের উপেক্ষা করে কে যাবে বিদেশে বল—আমি কোনো-মতে  
 বাসমতী-ধানক্ষেত ছেড়ে দিয়ে মালাবারে—উটির পর্বতে  
 যাবনাকো ;—দেখিব না পামগাছ মাথা নাড়ে সমুদ্রের গানে  
 কোন্ দেশে,—কোথায় এলাচিফুল দারুচিনি বারুণীর প্রাণে  
 বিনুনি খসায় বসে থাকিবার স্বপ্ন আনে ;—পৃথিবীর পথে

যাবনাকো : অশ্বখের বরাপাতা ম্লান শাদা ধুলোর ভিতর,  
 যখন এ-দু-পহরে কেউ নাই কোনো দিকে—পাখিটিও নাই,  
 অবিরল ঘাস শুধু ছড়ায়ে রয়েছে মাটি-কাঁকরের 'পর,  
 খড়কুটো উল্টায়ে ফিরিতেছে দু-একটা বিষণ্ণ চড়াই,  
 অশ্বখের পাতাগুলো পড়ে আছে ম্লান শাদা ধুলোর ভিতর ;  
 এই পথ ছেড়ে দিয়ে এ-জীবন কোনোখানে গেলনাকো তাই।

এখানে আকাশ নীল-নীলাভ আকাশ জুড়ে সজিনার ফুল  
 ফুটে থাকে হিম শাদা-রঙ তার আশ্বিনের আলোর মতন ;  
 আকন্দফুলের কালো ভীমরুল এইখানে করে গুঞ্জরন  
 রৌদ্রের দুপুর ভরে ;-বারবার রোদ তার সুচিক্ণ চুল  
 কাঁঠাল-জামের বুকো নিঙড়ায় ;-দহে বিলে চঞ্চল আঙুল  
 বুলায়ে-বুলায়ে ফেরে এইখানে জাম-লিচু-কাঁঠালের বন,  
 ধনপতি, শ্রীমন্তের, বেহুলার, লহনার ছুঁয়েছে চরণ ;  
 মেঠো পথে মিশে আছে কাক আর কোকিলের শরীরের ধুল,  
 কবেকার কোকিলের, জান কি তা ? যখন মুকুন্দরাম, হয়,  
 লিখিতেছিলেন বসে দু-পহরে সাধের সে চণ্ডিকামঙ্গল,  
 কোকিলের ডাক শুনে লেখা তার বাধা পায়-থেমে-থেমে যায় ;-  
 অথবা বেহুলা একা যখন চলেছে ভেঙে গাঙুড়ের জল  
 সন্ধ্যার অন্ধকারে, ধানক্ষেতে, আমবনে, অস্পর্শ শাখায়  
 কোকিলের ডাক শুনে চোখে তার ফুটেছিল কুয়াশা কেবল।

কোথাও মঠের কাছে—যেইখানে ভাঙা মঠ নীল হয়ে আছে  
 শ্যাওলায়—অনেক গভীর ঘাস জমে গেছে বুকের ভিতর,  
 পাশে দীঘি মজে আছে—রূপালি মাছের কণ্ঠে কামনার স্বর  
 যেইখানে পাটরানী আর তার রূপসী সখীরা শুনিয়াছে  
 বহু—বহু দিন আগে ;—যেইখানে শঙ্খমালা কাঁথা বুনিয়াছে  
 সে কত শতাব্দী আগে মাছরাঙা-ঝিলমিল ;—কড়ি-খেলা ঘর ;  
 কোন্ যেন কুহকীর ঝাড়ফুঁকে ডুবে গেছে সব তারপর ;  
 একদিন আমি যাব দু-পহরে সেই দূর প্রান্তরের কাছে,

সেখানে মানুষ কেউ যায়নাকো—দেখা যায় বাঘিনীর ডোরা  
 বেতের বনের ফাঁকে,—জারুল গাছের তলে রৌদ্র পোহায়  
 রূপসী মৃগীর মুখ দেখা যায়,—শাদা ভাঁটপুষ্পের তোড়া  
 আলোকলতার পাশে গন্ধ ঢালে দ্রোণফুল বাসকের গায় ;  
 তবুও সেখানে আমি নিয়ে যাব একদিন পাটকিলে ঘোড়া,  
 যার রূপ জন্মে-জন্মে কাঁদায়েছে আমি তারে খুঁজিব সেথায়।



চলে যাব শুকনো পাতা-ছাওয়া ঘাসে-জামরুল-হিজলের বনে ;  
 তলতা বাঁশের ছিপ হাতে রবে-মাছ আমি ধরিব না কিছু ;-  
 দীঘির জলের গন্ধে রূপালি চিতল তার রূপসীর পিছু  
 জামের গভীর পাতা-মাথা শান্ত নীল জলে খেলিছে গোপনে ;  
 আনারস-ঝোপে ঐ মাছরাঙা তারা মাছরাঙাটির মনে  
 অস্পষ্ট আলোয় যেন মুছে যায় ;-সিদুরের মতো রাঙা লিচু  
 ঝরে পড়ে পাতা ঘাসে,-চেয়ে দেখি কিশোরী করেছে মাথা নিচু-  
 এসেছে সে দুপুরে অবসরে জামরুল লিচু আহরণে-

চলে যায় ; নীলাম্বরী সরে যায় কোকিলের পাখনার মতো  
 ক্ষীরায়ের শাখা ছুঁয়ে চালতার ডাল ছেড়ে বাঁশের পিছনে  
 কোনো দূর আকাজক্ষার ক্ষেতে মাঠে চলে যায় যেন অব্যাহত,  
 যদি তার পিছে যাও দেখিবে সে আকন্দের করবীর বনে  
 ভোমরার ভয়ে ভীরু ; বহুক্ষণ পায়চারি করে আনমনে  
 তারপর চলে গেল : উড়ে গেল যেন নীল ভোমরার সনে।

এখানে ঘুঘুর ডাকে অপরাহ্নে শান্তি আসে মানুষের মনে ;  
 এখানে সবুজ শাখা আঁকাবাঁকা হলুদ পাখিরে রাখে ঢেকে ;  
 জামের আড়ালে সেই বউকথাকওটিরে যদি ফেল দেখে  
 একবার,—একবার দু-পহর অপরাহ্নে যদি এই ঘুঘুর গুঞ্জে  
 ধরা দাও—তা হলে অনন্তকাল থাকিতে হবে যে এই বনে ;  
 মৌরীর গন্ধ মাখা ঘাসের শরীরে ক্লান্ত দেহটিরে রেখে  
 আশ্বিনের ক্ষেতঝরা কচি-কচি শ্যামাপোকাদের কাছে ডেকে  
 রব আমি ;—চাকোরীর সাথে যেন চাকোরের মতন মিলনে ;

উঠানে কে রূপবতী খেলা করে—ছড়িয়ে দিতেছে বুঝি ধান  
 শালিকেরে : ঘাস থেকে ঘাসে-ঘাসে খুঁটে-খুঁটে খেতেছে সে তাই ;  
 হলুদ নরম পায়ে খয়েরি শালিকগুলো ডলিছে উঠান ;  
 চেয়ে দেখ সুন্দরীরে : গোরোচনা রূপ নিয়ে এসেছে কি রাই !

নীলনদে—গাঢ় রৌদ্রে—কবে আমি দেখিয়াছি—করেছিল স্নান—

শ্মশানের দেশে তুমি আসিয়াছ—বহুকাল গেয়ে গেছ গান  
 সোনালি চিলের মতো উড়ে-উড়ে আকাশের রৌদ্র আর মেঘে—  
 লক্ষ্মীর বাহন যেই স্নিগ্ধ পাখি আশ্বিনের জ্যেৎস্নার আবেগে  
 গান গায়—শুনিয়াছি রাখিপূর্ণিমার রাতে তোমার আহ্বান  
 তার মতো ; আম-চাঁপা-কদমের গাছ থেকে গাহে অফুরান  
 যেন স্নিগ্ধ ধান ঝরে...অনন্ত সবুজ শালি আছে যেন লেগে  
 বুকে তব ; বন্থালের বাংলায় কবে যে উঠিলে তুমি জেগে ;  
 পদ্মা-মেঘনা-ইছামতী নয় শুধু—তুমি কবি করিয়াছ ম্লান

সাত-সমুদ্রের জলে,—ঘোড়া নিয়ে গেছ তুমি ধূম্র নারীদেশে  
 অর্জুনের মতো, আহা—আরও দূর ম্লান নীল রূপের কুয়াশা  
 ফুঁড়েছে সুপর্ণ তুমি—দূর রঙ আরও দূর রেখা ভালোবেসে ;  
 আমাদের কালীদহ—গাঙুড়—গাঙের চিল তবু ভালোবাসা  
 চায় যে তোমার কাছে—চায়, তুমি ঢেলে দাও নিজেদের নিঃশেষে  
 এই দহে—এই চূর্ণ মঠে-মঠে—এই জীর্ণ বটে বাঁধ বাসা।

তবু তাহা ভুল জানি—রাজবল্লভের কীর্তি ভাঙে কীর্তিনাশা ;  
 তবুও পদ্যার রূপ একুশরত্নের চেয়ে আরও ঢের গাঢ়—  
 আরও ঢের প্রাণ তার, বেগ তার, আরও ঢের জল, জয় আরও ;  
 তোমারও পৃথিবী পথ ; নক্ষত্রের সাথে তুমি খেলিতেছ পাশা :  
 শঙ্খমালা নয় শুধু : অনুরাধা-রোহিণীরও চাও ভালোবাসা,  
 না জানি সে কত আশা—কত ভালোবাসা তুমি বাসিতে গো পার !  
 এখানে নদীর ধারে বাসমতী ধানগুলো ঝরিছে আবারও ;  
 প্রান্তরের কুয়াশায় এইখানে বাদুড়ের যাওয়া আর আসা—

এসেছে সন্ধ্যার কাক ঘরে ফিরে ;—দাঁড়ায়ে রয়েছে জীর্ণ মঠ ;  
 মাঠের আঁধার পথে শিশু কাঁদে—লালপেড়ে পুরোনো শাড়ির  
 ছবিটি মুছিয়া যায় ধীরে-ধীরে—কে এসেছে আমার নিকট ?

‘কার শিশু ? বলো তুমি’ : শুধালাম ; উত্তর দিল না কিছু বট ;  
 কেউ নাই কোনোদিকে—মাঠে-পথে কুয়াশার ভিড় ;  
 তোমারে শুধাই কবি : ‘তুমিও কি জান কিছু এই শিশুটির।’

সোনার খাঁচার বুকে রহিব না আমি আর শকের মতন ;  
 কী গল্প শুনতে চাও তোমরা আমার কাছে—কোন্ গান, বলো,  
 তাহলে এ দেউলের খিলানের গল্প ছেড়ে চলো, উড়ে চলো—  
 যেখানে গভীর ভোরে নোনাফল পাকিয়াছে,—আছে আতাবন ;  
 পউষের ভিজে ভোরে, আজ হয় মন যেন করিছে কেমন ;—  
 চন্দ্রমালা, রাজকন্যা, মুখ তুলে চেয়ে দেখো—শুধাই, শুন লো,  
 কী গল্প শুনতে চাও তোমরা আমার কাছে,—কোন্ গান, বলো,  
 আমার সোনার খাঁচা খুলে দাও, আমি যে বনের হীরামন ;

রাজকন্যা শোনেনাকো—আজ ভোরে আরসীতে দেখেনাকো মুখ,  
 কোথায় পাহাড় দূরে শাদা হয়ে আছে যেন কড়ির মতন,—  
 সেইদিকে চেয়ে-চেয়ে দিনভোর ফেটে যায় রূপসীর বুক !

তবুও সে বোঝে না কি আমারও যে সাধ আছে—আছে আনমন  
 আমারও যে...চন্দ্রমালা, রাজকন্যা, শোনো-শোনো, তোলো তো চিবুক।  
 হাড়পাহাড়ের দিকে চেয়ে-চেয়ে হিম হয়ে গেছে তার স্তন।

কতদিন সন্ধ্যার অন্ধকারে মিলিয়াছি আমরা দু-জনে ;  
 আকাশপ্রদীপ জেলে তখন কাহারা যেন কার্তিকের মাস  
 সাজায়েছে,—মাঠ থেকে গাজন গানের ম্লান ধোঁয়াটে উচ্ছ্বাস  
 ভেসে আসে ;—ডানা তুলে সাপমাসী উড়ে যায় আপনার মনে  
 আকন্দ-বনের দিকে ;—একদল দাঁড়কাক ম্লান গুঞ্জরনে  
 নাটার মতন রাঙা মেঘ নিঙড়ায়ে নিয়ে সন্ধ্যার আকাশ  
 দু-মুহূর্ত ভরে রাখে—তারপর মৌরীর গন্ধ-মাখা ঘাস  
 পড়ে থাকে ; লক্ষ্মীপেঁচা ডাল থেকে ডালে শুধু উড়ে চলে বনে

আধ-ফোটা জ্যোৎস্নায় ; তখন ঘাসের পাশে কতদিন তুমি  
 হলুদ-শাড়িটি-বুকে অন্ধকারে ফিঙ্গার পাখনার মতো  
 বসেছ আমার কাছে এইখানে—আসিয়াছে শটবন চুমি  
 গভীর আঁধার আরও—দেখিয়াছি বাদুড়ের মৃদু অবিরত  
 আসা-যাওয়া আমরা দুজনে বসে—বলিয়াছি ছেঁড়াফাঁড়া কত  
 মাঠ ও চাঁদের কথা : ম্লান চোখে একদিন সব শুনেছ তো।

এ-সব কবিতা আমি যখন লিখেছি বসে মনে একা ;  
 চালতার পাতা থেকে টুপ্-টুপ্ জ্যেৎস্নায় ঝরেছে শিশির ;  
 কুয়াশায় স্থির হয়ে ছিল ম্লান ধানসিড়ি নদীটির তীর ;  
 বাদুড় আঁধার ডানা মেলে হিম জ্যেৎস্নায় কাটিয়াছে রেখা  
 আকাঙ্ক্ষার ; নিভু দীপ আগলায়ে মনোরমা দিয়ে গেছে দেখা  
 সঙ্গে তার কবেকার মৌমাছির...কিশোরীর ভিড়  
 আমার বউল দিল শীতরাতে ;-আনিল আতার হিম ক্ষীর ;  
 মলিন আলোয় আমি তাহাদের দেখিলাম,-এ কবিতা লেখা

তাহাদের ম্লান চুল মনে করে ; তাহাদের কড়ির মতন  
 ধূসর হাতের রূপ মনে করে ; তাহাদের হৃদয়ের তরে।  
 সে কত শতাব্দী আগে তাহাদের করুণ শঙ্খের মতো স্তন  
 তাদের হলুদ শাড়ি-ক্ষীর দেহ-তাহাদের অপরূপ মন  
 চলে গেছে পৃথিবীর সবচেয়ে শান্ত হিম সান্ত্বনার ঘরে :  
 আমার বিষণ্ণ স্বপ্নে থেকে-থেকে তাহাদের ঘুম ভেঙে পড়ে।

কতদিন তুমি আর আমি এসে এইখানে বসিয়াছি ঘরের ভিতর  
 খড়ের চালের নিচে, অন্ধকারে ;—সন্ধ্যায় ধূসর সজল  
 মৃদু হাত খেলিতেছে হিজল জামের ডালে—বাদুড় কেবল  
 করিতেছে আসা-যাওয়া আকাশের মৃদু পথে,—ছিন্ন ভিজে খড়  
 বুকে নিয়ে সনকার মতো যেন পড়ে আছে নরম প্রান্তর ;  
 বাঁকা চাঁদ চেয়ে আছে ;—কুয়াশায় গা ভাসায়ে দেয় অবিরল  
 নিঃশব্দ গুবরে-পোকা—সাপমাসী—ধানী শ্যামাপোকাদের দল ;  
 দিকে-দিকে চল-ধোয়া গন্ধ মৃদু—ধূসর শাড়ির ক্ষীণ স্বর

শোনা যায় ;—মানুষের হৃদয়ের পুরোনো নীরব  
 বেদনার গন্ধ ভাসে ;—খড়ের চালের নিচে তুমি আর আমি  
 কতদিন মলিন আলোয় বসে দেখেছি বুঝেছি এই সব ;  
 সময়ের হাত থেকে ছুটি পেয়ে স্বপনের গোধূলিতে নামি  
 খড়ের চালের নিচে মুখোমুখি বসে থেকে তুমি আর আমি  
 ধূসর আলোয় বসে কতদিন দেখেছি বুঝেছি এই সব।



এখানে প্রাণের স্রোত আসে যায়—সন্ধ্যায় ঘুমায় নীরবে  
 মাটির ভিটের 'পরে—লেগে থাকে অন্ধকার ধুলোর আঘ্রাণ  
 তাহাদের চোখে-মুখে ;—কদমের ডালে পৈঁচা গেয়ে যায় গান ;  
 মনে হয় একদিন পৃথিবীতে হয়তো এ জ্যোৎস্না শুধু রবে,  
 এই শীত রবে শুধু ; রাত্রি ভরে এই লক্ষ্মীপৈঁচা কথা কবে—  
 কাঁঠালের ডাল থেকে হিজলের ডালে গিয়ে করিবে আহ্বান  
 সাপমাসী পোকাটিরে...সেই দিন আঁধারে উঠিবে নড়ে ধান  
 ইঁদুরের ঠোঁটে-চোখে—বাদুড়ের কালো ডানা করমচা-পল্লবে

কুয়াশারে নিঙড়ায়ে উড়ে যাবে আরও দূর নীল কুয়াশায়,  
 কেউ তাহা দেখিবে না ;—সেদিন পাড়াগাঁর পথের বিস্ময়  
 দেখিতে পাব না আর—ঘুমায়ে রহিবে সব : যেমন ঘুমায়  
 আজ রাতে—মৃত যারা ; যেমন হতেছে ঘুমে ক্ষয়  
 অশ্বখ ঝাউয়ের পাতা চুপে-চুপে আজ রাতে, হয় ;  
 যেমন ঘুমায় মৃতা,—তাহার বুকের শাড়ি যেমন ঘুমায়।

একদিন যদি আমি কোনো দূর মান্দ্রাজের সমুদ্রের জলে  
 ফেনার মতন ভাসি শীত রাতে—আসিনাকো তোমাদের মাঝে  
 ফিরে আর—লিচুর পাতার 'পরে বহুদিন সাঁঝে  
 যেই পথে আসা-যাওয়া করিয়াছি,—একদিন নক্ষত্রের তলে  
 কয়েকটা নাট্যফল তুলে নিয়ে আনারসী শাড়ির আঁচলে  
 ফিঙার মতন তুমি লঘু চোখে চলে যাও জীবনের কাজে,  
 এই শুধু...বেজির পায়ের শব্দ পাতার উপরে যদি বাজে  
 সারারাত...ডানার অস্পষ্ট ছায়া বাদুড়ের ক্লান্ত হয়ে চলে  
 যদি সে-পাতার 'পরে,—শেষ রাতে পৃথিবীর অন্ধকারে শীতে  
 তোমার ক্ষীরের মতো মৃদু দেহ—ধূসর চিবুক, বাম হাত  
 চালতা গাছের পাশে খোঁড়া ঘরে স্নিগ্ধ হয়ে ঘুমায় নিভতে,  
 তবুও তোমার ঘুম ভেঙে যাবে একদিন চুপে অকস্মাৎ,  
 তুমি যে কড়ির মালা দিয়েছিলে—সে হার ফিরায়ে দিয়ে দিতে  
 যখন কে এক ছায়া এসেছিল...দরজায় করেনি আঘাত।

দূর পৃথিবীর গন্ধে ভরে ওঠে আমার এ বাঙালির মন  
 আজ রাতে ; একদিন মৃত্যু এসে যদি দূর নক্ষত্রের তলে  
 অচেনা ঘাসের বুকো আমারে ঘুমায়ে যেতে বলে,  
 তবুও সে ঘাস এই বাংলার অবিরল ঘাসের মতন  
 মউরির মৃদু গন্ধে ভরে রবে ;—কিশোরীর স্তন  
 প্রথম জননী হয়ে যেমন ননীর চেউয়ে গলে  
 পৃথিবীর সব দেশে—সবচেয়ে ঢের দূর নক্ষত্রের তলে  
 সব পথে এইসব শান্তি আছে : ঘাস—চোখ—শাদা হাত—স্তন—  
 কোথাও আসিবে মৃত্যু—কোথাও সবুজ মৃদু ঘাস  
  
 আমারে রাখিবে ঢেকে—ভোরে, রাতে, দু-পহরে পাখির হৃদয়  
 ঘাসের মতন সাথে ছেয়ে রবে—রাতের আকাশ  
 নক্ষত্রের নীল ফুলে ফুটে রবে ;—বাংলার নক্ষত্র কি নয় ?  
 জানিনাকো ; তবুও তাদের বুকো স্থির শান্তি—শান্তি লেগে রয় :  
 আকাশের বুকো তারা যেন চোখ—শাদা হাত—যেন স্তন—ঘাস—

## ১৩২৬-এর কতকগুলো দিনের স্মরণে

অশ্বখ বটের পথে অনেক হয়েছি আমি তোমাদের সাথী ;  
 ছড়ায়েছি খই ধান বহু দিন উঠানের শালিকের তরে ;  
 সন্ধ্যায় পুকুর থেকে হাঁসটিরে নিয়ে আমি তোমাদের ঘরে  
 গিয়েছি অনেক দিন,—দেখিয়াছি ধূপ জ্বাল, ধর সন্ধ্যাবাতি  
 খোড়ের মতন শাদা ভিজে হাতে,—এখুনি আসিবে কিনা রাতি  
 বিনুনি বেঁধেছ তাই—কাঁচপোকা-টিপ তুমি কপালের 'পরে  
 পরিয়াছ...তারপর ঘুমায়েছ : কঙ্কাপাড় আঁচলটি ঝরে  
 পানের বাটার 'পরে ; নোনার মতন নম্র শরীরটি পাতি

নির্জন পালঙ্কে তুমি ঘুমায়েছ,—বউকতাকওটির ছানা  
 নীল জামরুল-নীড়ে—জ্যোৎস্নায়—ঘুমায়ে রয়েছে যেন, হয়,  
 আর রাত্রি মাতা-পাখিটির মতো ছড়ায়ে রয়েছে তার ডানা।  
 আজ আমি ক্লান্ত চোখে ব্যবহৃত জীবনের ধুলোয় কাঁটায়  
 চলে গেছি বহু দূরে ;—দেখনিকো, বোঝনিকো, করনিকো মানা ;  
 রূপসী শঙ্খের কৌটা তুমি যে গো প্রাণহীন—পানের বাটায়।

ঘাসের বুকের থেকে কবে আমি পেয়েছি যে আমার শরীর—  
 সবুজ ঘাসের থেকে ; তাই রোদ ভালো লাগে—তাই নীলাকাশ  
 মৃদু ভিজে স করুণ মনে হয় ;—পথে-পথে তাই এই ঘাস  
 জলের মতন স্নিগ্ধ মনে হয় ;—মউমাছীদের যেন নীড়  
 এই ঘাস ;—যত দূর যাই আমি আরও যত দূর পৃথিবীর  
 নরম পায়ের তলে যেন কত কুমারীর বুকের নিঃশ্বাস  
 কথা কয়—তাহাদের শান্ত হাত খেলা করে—তাদের খোঁপার এলো ফাঁস  
 খুলে যায়—ধূসর শাড়ির গন্ধে আসে তারা—অনেক নিবিড়  
  
 পুরোনো প্রাণের কথা কয়ে যায়—হৃদয়ের বেদনার কথা—  
 সান্ত্বনার নিভৃত নরম কথা—মাঠের চাঁদের গল্প করে—  
 আকাশের নক্ষত্রের কথা কয় ;—শিশিরের শীত সরলতা  
 তাহাদের ভালো লাগে ;—কুয়াশারে ভালো লাগে চোখের উপরে ;  
 গরম বৃষ্টির ফোঁটা ভালো লাগে ; শীত রাতে—পেঁচার নম্রতা ;  
 ভালো লাগে এই যে অশ্বখপাতা আমপাতা সারারাত ঝরে।

## বৃষ্টির জল

এই জল ভালো লাগে ;-বৃষ্টির রূপালি জল কতদিন এসে  
 ধুয়েছে আমার দেহ-বুলায়ে দিয়েছে চুল-চোখের উপরে  
 তার শান্ত স্নিগ্ধ হাত রেখে কত খেলিয়াছে,-আবেগের ভরে  
 ঠোঁটে এসে চুমো দিয়ে চ'লে গেছে কুমারীর মতো ভালোবেসে ;  
 এই জল ভালো লাগে ;-নীল পাতা মৃদু ঘাস রৌদ্রের দেশে  
 ফিঙা যেমন তার দিনগুলো ভালোবাসে-বনের ভিতরে  
 বারবার উড়ে যায়,-তেমনি গোপন প্রেমে এই জল ঝরে  
 আমার দেহের 'পরে আমার চোখের 'পরে ধানের আবেশে  
 ঝরে পড়ে ;-যখন অঘ্রান রাতে ভরা ক্ষেত হয়েছে হলুদ,  
 যখন জামের ডালে পেঁচার নরম হিম গান শোনা যায়,  
 বনের কিনারে ঝরে যেই ধান বুকু করে শান্ত শালি-স্কুদ,  
 তেমনি ঝরিছে জল আমার ঠোঁটের 'পরে-চোখের পাতায়-  
 আমার চুলের 'পরে ;-অপরাহে রাঙা রোদ সবুজ আতায়  
 রেখেছে নরম হাত যেন তার-ঢালিছে বুকুর থেকে দুধ।

## ৪৬

একদিন পৃথিবীর পথে আমি ফলিয়াছি ; আমার শরীর  
নরম ঘাসের পথে হাঁটিয়াছে ; বসিয়াছে ঘাসে,  
দেখিয়াছে নক্ষত্রেরা জোনাকিপোকাকার মতো কৌতুকের অমেয় আকাশে  
খেলা করে ; নদীর জলের গন্ধে ভরে যায় ভিজ়ে স্নিগ্ধ তীর  
অন্ধকারে ; পথে-পথে শব্দ পাই কাহাদের নরম শাড়ির,  
ম্লান চুল দেখা যায় ; সান্ত্বনার কথা নিয়ে কারা কাছে আসে—  
ধূসর কড়ির মতো হাতগুলো—নগ্ন হাত সন্ধ্যার বাতাসে  
দেখা যায় ; হলুদ ঘাসের কাছে মরা হিম প্রজাপতিটির

সুন্দর করুণ পাখা পড়ে আছে—দেখি আমি ; চুপে থেমে থাকি ;  
আকাশে কমলা রঙ ফুটে ওঠে সন্ধ্যায়—কাকগুলো নীল মনে হয় ;  
অনেক লোকের ভিড়ে ডুবে যাই—কথা কই—হাতে হাত রাখি :

করুণ বিষণ্ণ চুলে কার যেন কোথাকার গভীর বিস্ময়  
লুকায়ে রয়েছে বুঝি...নক্ষত্রের নিচে আমি ঘুমাই একাকী।  
পেঁচার ধূসর ডানা সারারাত জোনাকির সাথে কথা কয়।

BANGLADARSHAN.COM

পৃথিবীর পথে আমি বহু দিন বাস করে হৃদয়ের নরম কাতর  
 অনেক নিভৃত কথা জানিয়াছি ; পৃথিবীতে আমি বহুদিন  
 কাটায়েছি ; বনে-বনে ডালপালা উড়িতেছে—যেন পরী জিন্  
 কথা কয় ; ধূসর সন্ধ্যায় আমি ইহাদের শরীরের 'পর  
 খইয়ের ধানের মতো দেখিয়াছি ঝরে ঝর্-ঝর্  
 দু-ফোঁটা মাঘের বৃষ্টি,—শাদা ধুলো জলে ভিজে হয়েছে মলিন,  
 ম্লান গন্ধ মাঠে-ক্ষেতে—গুবরে পোকার তুচ্ছ বুক থেকে ক্ষীণ  
 অস্পষ্ট করুণ শব্দ ডুবিতেছে অন্ধকারে নদীর ভিতর :

এইসব দেখিয়াছি ; দেখিয়াছি নদীটিরে—মজিতেছে ঢালু অন্ধকারে ;  
 সাপমাসী উড়ে যায় ; দাঁড়কাক অশ্বখের নীড়ের ভিতর  
 পাখনার শব্দ করে অবিরাম ; কুয়াশায় একাকী মাঠের ধারে  
 কে যেন দাঁড়িয়ে আছে ; আরও দূরে দু-একটা স্তম্ভ খোঁড়ো ঘর  
 পড়ে আছে ; খাগড়ার বনে ব্যাঙ ডাকে কেন—থামিতে কি পারে ;  
 (কাকের তরুণ ডিম পিছলায়ে পড়ে যায় শ্যাওড়ার ঝাড়ে।)



মানুষের ব্যথা আমি পেয়ে গেছি পৃথিবীর পথে এসে—হাসির আনন্দ  
 পেয়ে গেছি ; দেখেছি আকাশে দূরে কড়ির মতন শাদা মেঘের পাহাড়ে  
 সূর্যের রাঙা ঘোড়া : পক্ষিরাজের মতো কমলারঙের পাখা ঝাড়ে  
 রাতের কুয়াশা ছিঁড়ে ; দেখেছি শরের বনে শাদা রাজহাঁসদের সাধ  
 উঠেছে আনন্দে জেগে—নদীর স্রোতের দিকে বাতাসের মতন অবাধ  
 চলে গেছে কলরবে ; দেখেছি সবুজ ঘাস—যত দূর চোখ যেতে পারে :  
 ঘাসের প্রকাশ আমি দেখিয়াছি অবিরল,—পৃথিবীর ক্লান্ত বেদনারে  
 ঢেকে আছে ; দেখিয়াছি বাসমতী, কাশবন, আকাজ্জক রক্ত, অপরাধ  
 মুছিয়ে দিতেছে যেন বারবার—কোন এক রহস্যের কুয়াশার থেকে  
 যেখানে জন্মে না কেউ, যেখানে মরে না কেউ, সেই কুহকের থেকে এসে  
 রাঙা রোদ, শালিধান, ঘাস, কাশ, মরালেরা বারবার রাখিতেছে ঢেকে  
 আমাদের রক্ষ প্রশ্ন, ক্লান্ত ক্ষুধা, স্পষ্ট মৃত্যু—আমাদের বিস্মিত নীরব  
 রেখে দেয়—পৃথিবীর পথে আমি কেটেছি আঁচড় ঢের, অশ্রু গেছি রেখে :  
 তবু ঐ মরালীরা কাশ ধান রোদ ঘাস এসে এসে মুছে দেয় সব।

তুমি কেন বহু দূরে-ঢের দূরে-আরও দূরে-নক্ষত্রের অস্পষ্ট আকাশ,  
 তুমি কেন কোনোদিন পৃথিবীর ভিড়ে এসে বলনাকো একটিও কথা ;  
 আমরা মিনার গড়ি-ভেঙে পড়ে দু-দিনেই-স্বপনের ডানা ছিঁড়ে ব্যথা  
 রক্ত হয়ে ঝরে শুধু এইখানে-ক্ষুধা হয়ে ব্যথা দেয়-নীল নাভিশ্বাস  
 ফেনায়ে তুলিছে শুধু পৃথিবীতে পিরামিড-যুগ থেকে আজও বারোমাস ;  
 আমাদের সত্য, আহা, রক্ত হয়ে ঝরে শুধু ;-আমাদের প্রাণের মমতা  
 ফড়িঙের ডান নিটে ওড়ে, আহা : চেয়ে দেখে অন্ধকার কঠিন ক্ষমতা  
 ক্ষমাহীন-বার-বার পথ আটকায়ে ফেলে-বার-বার করে তারে গ্রাস ;

তারপর চোখ তুলে দেখি অই কোন্ দূর নক্ষত্রের ক্লান্ত আয়োজন  
 ক্লান্তিতে ভুলিতে বলে-ঘিয়ের সোনার-দীপে লাল-নীল শিখা  
 জ্বলিতেছে যেন দূর রহস্যের কুয়াশায়,-আবার স্বপ্নের গন্ধে মন  
 কেঁদে ওঠে ;-তবু জানি আমাদের স্বপ্ন হতে অশ্রু-ক্লান্তি-রক্তের কণিকা  
 ঝরে শুধু-স্বপ্ন কি দেখেনি বুদ্ধ-নিউসিডিয়ায় বসে দেখেনি মণিকা ?  
 স্বপ্ন কি দেখেনি রোম, এশিরিয়া, উজ্জয়িনী, গৌড়-বাংলা, দিল্লি, বেবিলন ?

আমাদের রুঢ় কথা শুনে তুমি সরে যাও আরও দূরে বুঝি নীলাকাশ ;  
 তোমার অনন্ত নীল সোনালি ভোমরা নিয়ে কোনো দূর শান্তির ভিতরে  
 ডুবে যাবে ?...কত কাল কেটে গেল, তবু তার কুয়াশার পর্দা না সরে,  
 পিরামিড-বেবিলন শেষ হল-ঝরে গেল কতবার প্রান্তরের ঘাস ;  
 তবুও লুকায়ে আছে যেই রূপ নক্ষত্রে তা কোনোদিন হল না প্রকাশ ;  
 যেই স্বপ্ন সেই সত্য নিয়ে আজ আমরা চলিয়া যাই ঘরে,  
 কোনো এক অন্ধকারে হয়তো তা আকাশের যাযাবর মরালের স্বরে  
 নতুন স্পন্দন পায়-নতুন আগ্রহে গন্ধে ভরে ওঠে পৃথিবীর শ্বাস ;

তখন আমরা অই নক্ষত্রের দিকে চাই-মনে হয় সব অস্পষ্টতা  
 ধীরে-ধীরে ঝরিতেছে,-যেই রূপ কোনোদিন দেখি নাই পৃথিবীর পথে,  
 যেই শান্তি মৃত জননীর মতো চেয়ে থাকে-কয়নাকো কথা,  
 যেই স্বপ্ন বার-বার নষ্ট হয় আমাদের এই সত্য রক্তের জগতে,  
 আজ যাহা ক্লান্ত ক্ষীণ, আজ যাহা নগ্ন-চূর্ণ-অন্ধ মৃত-হিম,  
 একদিন নক্ষত্রের দেশে তারা হয়ে রবে গোলাপের মতন রঞ্জিম।

এই পৃথিবীতে আমি অবসর নিয়ে শুধু আসিয়াছি—আমি হুঁপ কবি  
 আমি এক ;—ধুয়েছি আমার দেহ অন্ধকারে একা-একা সমুদ্রের জলে ;  
 ভালোবাসিয়াছি আমি রাজা রোদ, ক্ষান্ত কার্তিকের মাঠে—ঘাসের আঁচলে  
 ফড়িঙের মতো আমি বেড়ায়েছি ;—দেখেছি কিশোরী এসে হলুদ করবী  
 ছিঁড়ে নেয়—বুকে তার লাল-পেড়ে ভিজে শাড়ি করুণ শঙ্খের মতো ছবি  
 ফুটাতেছে ;—ভোরের আকাশখানা রাজহাঁস ভরে গেছে নব কোলাহলে  
 নব-নব সূচনার ; নদীর গোলাপি ঢেউ কথা বলে—তবু কথা বলে,  
 তবু জানি তার কথা কুয়াশায় ফুরায় না—কেউ যেন শুনিতোছে সবই

কোন রাজা শাটিনের মেঘে বসে—অথবা শোনে না কেউ, শূন্য কুয়াশায়  
 মুছে যায় সব তার ; একদিন বর্ণচ্ছটা মুছে যাব আমিও অমন ;  
 তবু আজ সবুজ ঘাসের 'পরে বসে থাকি ; ভালোবাসি ; প্রেমের আশায়  
 পায়ের ধ্বনির দিকে কান পেতে থাকি চুপে ; কাঁটাবহরের ফল করি আহরণ :  
 কারে যেন এইগুলো দেব আমি ; মৃদু ঘাসে একা-একা বসে থাকা যায়  
 এইসব সাধ নিয়ে ; যখন আসিবে ঘুম তারপর, ঘুমাব তখন।

বাতাসে ধানের শব্দ শুনিয়াছি—ঝরিতেছে ধীরে-ধীরে অপরাহ্ন ভরে ;  
 সোনালি রোদের রঙ দেখিয়াছি—দেহের প্রথম কোন্ প্রেমের মতন  
 রূপ তার—এলোচুল ছড়িয়ে রেখেছে ঢেকে গূঢ় রূপ—আনারস-বন ;  
 ঘাস আমি দেখিয়াছি ; দেখেছি সজনে ফুল চুপে-চুপে পড়িতেছে ঝরে  
 মৃদু ঘাসে ; শান্তি পায় ; দেখেছি হলুদ পাখি বহুক্ষণ থাকে চুপ করে,  
 নির্জন আমার ডালে দুলে যায়—দুলে যায়—বাতাসের সাথে বহুক্ষণ ;  
 শুধু কথা, গান নয়—নীরবতা রচিত্তেছে আমাদের সবার জীবন  
 বুঝিয়াছি : শুপুরির সারিগুলো দিনরাত হাওয়ায় যে উঠিতেছে নড়ে,

দিনরাত কথা কয়, ক্ষীরের মতন ফুল বুকে ধরে, তাদের উৎসব  
 ফুরায় না ; মাছরাঙাটির সাথী মরে গেছে—দুপুরের নিঃসঙ্গ বাতাসে  
 তবু ঐ পাখিটির নীল-লাল-কমলা রঙের ডানা স্ফুট হয়ে ভাসে  
 আম নিম জামরুগলে ; প্রসন্ন প্রাণের স্রোত—অশ্রু নাই—প্রশ্ন নাই কিছু,  
 বিলম্বিত ডানা নিয়ে উড়ে যায় আকাশের থেকে দূর আকাশের পিছু ;  
 চেয়ে দেখি ঘুম নাই—অশ্রু নাই—প্রশ্ন নাই বটফলগন্ধ-মাখা ঘাসে।

একদিন এই দেহ ঘাস থেকে ধানের আশ্রাণ থেকে এই বাংলার  
 জেগেছিল ; বাঙালি নারীর মুখ দেখে রূপ চিনেছিল দেহ একদিন ;  
 বাংলার পথে-পথে হেঁটেছিল গাঙচিল শালিকের মতন স্বাধীন ;  
 বাংলার জল দিয়ে ধুয়েছিল ঘাসের মতন স্ফুট দেহখানি তার ;  
 একদিন দেখেছিল ধূসর বকের সাথে ঘরে চলে আসে অন্ধকার  
 বাংলার ; কাঁচা কাঠ জ্বলে ওঠে—নীল ধোঁয়া নরম মলিন  
 বাতাসে ভাসিয়া যায় কুয়াশার করুণ নদীর মতো ক্ষীণ ;  
 ফেনসা ভাতের গন্ধে আমমুকুলের গন্ধ মিশে যায় যেন বারবার ;

এইসব দেখেছিল ; রূপ যেই স্বপ্ন আনে—স্বপ্নে যেই রক্তাক্ততা আছে,  
 শিখেছিল সেইসব একদিন বাংলার চন্দ্রমালা রূপসীর কাছে ;  
 তারপর বেতবনে, জোনাকি ঝাঁঝির পথে হিজল আমের অন্ধকারে  
 ঘুরেছে সে সৌন্দর্যের নীল স্বপ্ন বুকে করে—রুঢ় কোলাহলে গিয়ে তারে—  
 ঘুমন্ত কন্যারে সেই—জাগাতে যায়নি আর—হয়তো সে কন্যার হৃদয়  
 শঙ্খের মতন রুম্ব, অথবা পদোর মতো—ঘুম তবু ভাঙিবার নয়।

আজ তারা কই সব ? ওখানে হিজল গাছ ছিল এক-পুকুরের জলে  
 বহুদিন মুখ দেখে গেছে তার ; তারপর কী যে তার মনে হল কবে  
 কখন সে ঝরে গেল, কখন ফুরাল, আহা,-চলে গেল কবে যে নীরবে,  
 তাও আর জানিনাকো-ঠোঁট-ভাঙা দাঁড়কাক ঐ বেলগাছটির তলে  
 রোজ ভোরে দেখা দিত-অন্য সব কাক আর শালিকের হুঁষ্ট কোলাহলে  
 তারে আর দেখিনাকো ; -কতদিন দেখি নাই ; সে আমার ছেলেবেলা হবে,  
 জানালার কাছে এক বোলতার চাক ছিল-হৃদয়ের গভীর উৎসবে  
 খেলা করে গেছে তারা কতদিন-ফড়িঙ কীটের দিন যতদিন চলে

তাহারা নিকটে ছিল-রোদের আনন্দে মেতে-অন্ধকারে শান্ত ঘুম খুঁজে  
 বহুদিন কাছে ছিল-অনেক কুকুর আজ পথে-ঘাটে নড়চড়া করে  
 তবুও আঁধারে ঢের মৃত কুকুরের মুখ-মৃত বিড়ালের ছায়া ভাসে ;  
 কোথায় গিয়েছে তারা ? অই দূর আকাশের নীল লাল তারার ভিতরে  
 অথবা মাটির বুকে মাটি হয়ে আছে শুধু-ঘাস হয়ে আছে শুধু ঘাসে ?  
 শুধালাম... উত্তর দিল না কেউ উদাসীন অসীম আকাশে।

হৃদয়ে প্রেমের দিন কখন যে শেষ হয়—চিঁতা শুধু পড়ে থাকে তার,  
 আমরা জানি না তাহা ;—মনে হয় জীবনে যা আছে আজও তাই শালিধান  
 রূপশালি ধান তাহা...রূপ, প্রেম...এই ভাবি...খোসার মতন নষ্ট ম্লান  
 একদিন তাহাদের অসাড়াতা ধরা পড়ে,—যখন সবুজ অন্ধকার,  
 নরম রাত্রির দেশ, নদীর জলের গন্ধ কোন্ এক নবীনাগতার  
 মুখখানা নিয়ে আসে—মনে হয় কোনোদিন পৃথিবীতে প্রেমের আহ্বান  
 এমন গভীর করে পেয়েছি কি : প্রেম যে নক্ষত্র আর নক্ষত্রের গান,  
 প্রাণ যে ব্যাকুল রাত্রি প্রান্তরের গাঢ় নীল অমাবস্যার—

চলে যায় আকাশের সেই দূর নক্ষত্রের লাল নীল শিখার সন্ধানে,  
 প্রাণ যে আঁধার রাত্রি আমার এ,—আর তুমি স্বাতীর মতন  
 রূপের বিচিত্র বাতি নিয়ে এলে,—তাই প্রেম ধুলায় কাঁটায় যেইখানে  
 মৃত হয়ে পড়ে ছিল পৃথিবীর শূন্য পথে পেল সে গভীর শিহরণ ;  
 তুমি সখি, ডুবে যাবে মুহূর্তেই রোমহর্ষে—অনিবার অরণের স্নানে  
 জানি আমি ; প্রেম যে তবুও প্রেম : স্বপ্ন নিয়ে বেঁচে রবে, বাঁচিতে সে জানে।



কোনোদিন দেখিব না তারে আমি ; হেমন্তে পাকিবে ধান, আষাঢ়ের রাতে  
 কালো মেঘ নিঙড়িয়ে সবুজ বাঁশের বন গেয়ে যাবে উচ্ছ্বাসের গান  
 সারারাত,—তবু আমি সাপচরা অন্ধ পথে—বেণুবনে তাহার সন্ধান  
 পাবনাকো : পুকুরের পাড়ে সে যে আসিবে না কোনোদিন হাসিনের সাথে,  
 সে কোনো জ্যোৎস্নায় আর আসিবে না—আসিবে না কখনও প্রভাতে,  
 যখন দুপুরে রোদে অপরাজিতার মুখ হয়ে থাকে ম্লান,  
 যখন মেঘের রঙে পথহারা দাঁড়কাক পেয়ে গেছে ঘরের সন্ধান,  
 ধূসর সন্ধ্যায় সেই আসিবে না সে এখানে ;—এইখানে ধুন্দুল লতাতে  
 জোনাকি আসিবে শুধু : ঝাঁঝি শুধু সারারাত কথা কবে ঘাসে আর ঘাসে ;  
 বাদুড় উড়িবে শুধু পাখনা ভিজিয়ে নিয়ে শান্ত হয়ে রাতের বাতাসে ;  
 প্রতিটি নক্ষত্র তার স্থান খুঁজে জেগে রবে প্রতিটির পাশে  
 নীরব ধূসর কণা লেগে রবে তুচ্ছ অণুকণাটির শ্বাসে  
 অন্ধকারে ;—তুমি, সখি, চলে গেলে দূরে তবু ;—হৃদয়ের গভীর বিশ্বাসে  
 অশ্বখের শাখা ঐ দুলিতেছে : আলো আসে, ভোর হয়ে আসে।

ঘাসের ভিতরে যেই চড়ায়ের শাদা ডিম ভেঙে আছে—আমি ভালোবাসি  
 নিস্তরু করুণ মুখ তার এই—কবে যেন ভেঙেছিল—ঢের ধুলো খড়  
 লেগে আছে বুক তার—বহুক্ষণ চেয়ে থাকি ;—তারপর ঘাসের ভিতর  
 শাদা-শাদা ধুলোগুলো পড়ে আছে দেখা যায় : খইধান দেখি একরাশি  
 ছড়িয়ে রয়েছে চুপে ; নরম বিষণ্ণ গন্ধ পুকুরের জল থেকে উঠতেছে ভাসি ;  
 কান পেতে থাক যদি—শোনা যায়, সরপুঁটি চিতলের উদ্ভাসিত স্বর  
 মীনকন্যাদের মতো : সবুজ জলের ফাঁকে তাদের পাতালপুরীর ঘর  
 দেখা যায়—রহস্যের কুয়াশায় অপরূপ—রূপালি মাছের দেহ গভীর উদাসী

চলে যায় মল্লিকুমারের মতো, কোটাল-ছেলের মতো, রাজার ছেলের মতো মিলে  
 কোন্ এক আকাজক্ষার উদঘাটনে কত দূরে ;—বহুক্ষণ চেয়ে থাকি একা ;  
 অপরাহ্ন এল বুঝি ?—রাঙা রৌদ্রে মাছরাঙা উড়ে যায়—ডানা ঝিলমিলে ;  
 এখুনি আসিবে সন্ধ্যা,—পৃথিবীতে ম্রিয়মাণ গোধূলি নামিলে  
 নদীর নরম মুখ দেখা যাবে—মুখে তার দেহে তার কত মৃদু রেখা  
 তোমারই মুখের মতো : তবুও তোমার সাথে কোনোদিন হবেনাকো দেখা।

(এই সব ভালো লাগে) : জানালার ফাঁক দিয়ে ভোরের সোনালি রোদ এসে  
আমারে ঘুমাতে দেখে বিছানায়,—আমার কাতর চোখ, আমার বিমর্ষ ম্লান চুল—  
এই নিয়ে খেলা করে : জানে সে যে বহুদিন আগে আমি করেছি কি ভুল  
পৃথিবীর সবচেয়ে ক্ষমাহীন গাঢ় এক রূপসীর মুখ ভালোবেসে :  
পউষের শেষ রাতে আজও আমি দেখি চেয়ে আবার সে আমাদের দেশে  
ফিরে এল ; রঙ তার কেমন তা জানে অই টস্টস্বে ভিজে জামরুল,  
নরম জামের মতো চুল তার, ঘুঘুর বুকুর মতো করুণ আঙুল ;—  
পউষের শেষ রাতে নিমপেঁচাটির সাথে আসে সে যে ভেসে  
কবেকার মৃত কাক : পৃথিবীর পথে আজ নাই সে তো আর ;  
তবুও সে ম্লান জানালার পাশে উড়ে আসে নীরব সোহাগে,  
মলিন পাখনা তার খড়ের চালের হিম শিশিরে মাখায় ;  
তখন এ পৃথিবী কোনো পাখি জেগে এসে বসেনি শাখায় ;  
পৃথিবীও নাই আর ;—দাঁড়কাক একা-একা সারারাত জাগে ;  
‘কী বা, হয়, আসে যায়, তারে যদি কোনোদিন না পাই আবার ?’

সন্ধ্যা হয়—চারিদিকে মৃদু নীরবতা ;  
খড় মুখে নিয়ে এক শালিক যেতেছে উড়ে চুপে ;  
গোরুর গাড়িটি যায় মেঠো পথ বেয়ে ধীরে-ধীরে ;  
আঙিনা ভরিয়া আছে সোনালি খড়ের ঘন স্তূপে ;  
পৃথিবীর সব ঘুঘু ডাকিতেছে হিজলের বনে ;  
পৃথিবীর সব রূপ লেগে আছে ঘাসে ;  
পৃথিবীর সব প্রেম আমাদের দু-জনার মনে ;  
আকাশ ছড়িয়ে আছে শান্তি হয়ে আকাশে-আকাশে।

একদিন কুয়াশার এই মাঠে আমারে পাবে না কেউ খুঁজে আর, জানি ;  
 হৃদয়ের পথ-চলা শেষ হল সেইদিন-গিয়েছে সে শান্ত হিম ঘরে,  
 অথবা সান্ত্বনা পেতে দেরি হবে কিছু কাল-পৃথিবীর এই মাঠখানি  
 ভুলিতে বিলম্ব হবে কিছু দিন ; এ মাঠের কয়েকটা শালিকের তরে

আশ্চর্য বিস্ময়ে আমি চেয়ে রব কিছুকাল অন্ধকার বিছানায় কোলে,  
 আর সে সোনালি চিল ডানা মেলে দূর থেকে আজও কি মাঠের কুয়াশায়  
 ভেসে আসে ? সেই ন্যাড়া অশ্বখের পানে আজও চলে যায় সন্ধ্যা সোনার মতো হলে  
 ধানের নরম শিষে মেঠো হুঁদুরের চোখ নক্ষত্রের দিকে আজও চায়

সন্ধ্যা হলে ? মউমাছি চাক আজও বাঁধে না কি জামের নিবিড় ঘন ডালে,  
 মউ খাওয়া হয়ে গেলে আজও তারা উড়ে যায় কুয়াশায় সন্ধ্যার বাতাসে-  
 কত দূরে যায়, আহা...অথবা হয়তো কেউ চালতার ঝরাপাতা জ্বালে  
 মধুর চাকের নিচে-মাছিগুলো উড়ে যায়...ঝরে পড়ে...মরে থাকে ঘাসে-

BANGLADARSHAN.COM

ভেবে-ভেবে ব্যথা পাব ;—মনে হবে, পৃথিবীর পথে যদি থাকিতাম বেঁচে,  
 দেখিতাম সেই লক্ষ্মীপেঁচাটির মুখ যারে কোনোদিন ভালো করে দেখি নাই আমি—  
 এমনি লাজুক পাখি,—ধূসর ডানা কি তার কুয়াশার ঢেউয়ে ওঠে নেচে ;  
 যখন সাতটি তারা ফুটে ওঠে অন্ধকারে গাবের নিবিড় বৃকে আসে সে কি নামি ?

জিউলির বাবলার আঁধার গলির ফাঁকে জোনাকির কুহকের আলো  
 ঝরে না কি ? ঝিঝির সবুজ মাংসে ছোটো-ছোটো ছেলেমেয়ে বউদের প্রাণ  
 ভুলে যায় ; অন্ধকারে খুঁজে তারে আকন্দবনের ভিড়ে কোথায় হারালো  
 মাকাল লতার তলে শিশিরের নীল জলে কেউ তার পাবে না সন্ধান।

আর সেই সোনালি চিলের ডানা—ডানা তার আজও কি মাঠের কুয়াশায়  
 ভেসে আসে ?—সেই ন্যাড়া অশ্বখের পানে আজও চলে যায়

সন্ধ্যা সোনার মতো হলে ?

ধানের নরম শিষে মেঠো হাঁদুরের চোখ নক্ষত্রের দিকে আজও চায় ?  
 আশ্চর্য বিস্ময়ে আমি চেয়ে রব কিছু কাল অন্ধকার বিছানার কোলে।